



人生悲喜曲

【落雨天】

一陣生狂雨 一支小雨傘
 生份的人變熟似
 一領外衫 一句關懷
 寂寞的情起風颳
 一个眼神 一份期待
 規个心燒烙起來

【思念】

來無通知 去無相辭
 一睏仔走來目睷墘
 一時仔趁(sô)去耳空邊
 一下仔peh上頭殼nih
 一目nih仔閣鑽入心肝inn
 掠也掠袂著 趕也趕袂去
 為何暝日攏想伊

【相思】

日郎沓沓仔落海 月娘寬寬仔上山
 二人恬恬仔相思
 一日望過一日 一冬向過一冬
 牛郎 織女七夕嘛會相見
 咱二人是愛等到底當時

【花離枝】

花離枝 人失意
 一杯一杯醉落去
 規暗袂睏到半暝

花離枝 空相思
 一葉一葉lian落去
 規身冷甲若寒天

花離枝 心已死
 一聲一聲叫袂醒
 當時才欲puh新inn

【真情】

真情真愛感動天
 結連理 相扶持
 山珍算啥物 海味無稀奇
 生活困苦也歡喜
 粗菜清水嘛甘甜

【人生】

一杯水

無芳 無甜 袂茫 袂醉
啉較久就袂畏

一杯茶

會芳 會甘 淡薄仔茫 淡薄仔醉
啉較濟就淡薄仔痴

一杯酒

有苦 有甜 會茫 會醉
啉較雄煞袂甜干焦醉

【毋甘】

情人節彼一暗

無玫瑰花恰巧克力

毋甘予阮失望

兩人來到海港 散步 賞夜景

阮的心就茫茫茫

落大雨彼一工

無紮雨傘去peh山

毋甘予阮沃澹

褪外衫做雨蓬 呼噓仔拈楓仔葉

阮的心就齊輕鬆

三月雪彼一冬

無相辭就離開

毋甘予阮目箍紅

來夢中報平安 才知你去另外一个世間

阮的心閣較——毋甘

【歡喜心】

一片雲自在輕鬆

一蕊花美麗清芳

一檳樹仔予人bih蔭歇涼

一首歌仔賜人止痛療傷

一支筆彩畫出五花十色的人間

一本冊教化著大千世界的眾人

一句話轉意轉念

一葩火照路照巷

我要化做千千萬萬項

歡歡喜喜照顧別人

向望

家家和諧閣吉祥

人人快樂又平安

創作理念

有人愛塗鴨、有人愛寫詩，但皆不外乎情感的寄託，我閒來無事喜歡隨便寫寫，觸景生情、有感而發也喜歡隨便寫寫。

情是長在懸崖上的花苞、愛是盛開的花朵，而人生則是花開、花謝的整個過程，雖有驚險、無奈，但更有美麗、璀璨、芳香的時候，一份情、一個故事不斷的銜接，讓我們的生命力不斷的昇華且變得更豐富而圓滿。

用人生的悲、喜交織成一串的組曲，雖非「人不輕狂枉少年」，但至少紀錄下來後就不會有遺憾，生命也不會留白了。

韓 滿

嘉義市育人國小教師、嘉義市閩南語輔導員

